

QUARTA SESSIONE STRASURDINARIA DI U 2018
30 È 31 DI MAGHJU

2018/E4/028

Dumanda sposta da u Sgiò Jean Martin MONDOLONI

A Nome di u gruppu « PER L'AVVENE »

Question déposée par M. Jean-Martin MONDOLONI

Au nom du groupe "PER L'AVVENE"

OGETTU : Avvene ghjudiricu di a spluttera di l'Acque d'Orezza

Sgiò Presidente,

E virtù terapeutiche di l'acque d'Orezza sò da parechji seculi cunniscute , ancu s'ellu ci hè tucatu à aspettà u 1856 per ch'ella fessi l'ogettu a fonte d'un arrestatu ministeriale di permessu di spluttera è u 1866 per ch'ella sia dichjarata d'interessu publicu, pocu dopu chì Napoleone III li appii attribuitu a Medaglia d'Oru in u 1865.

À st'acqua li tocca una vintina d'anni pè ghjunghje finu à a chena duv'ella hè stratta, vint'anni durente i quali piglia u tempu di purificà si è d'arricchisce si di sale minerale è di carbonati di ferru in e capillarità di u sottu terra fecondu di a Castagniccia, è propiu à l'agrottu di ogni pulluzione. Di più ch'è una risolsa, hè una ricchezza ch'ella ci dà a terra nostra.

U situ dispone oramai d'un cumplissu industriale è d'un laboratoriu d'assicurezza qualità, chì impiega una trentina di salariati à l'annu. Un rivenutu annuale di 8 milioni d'euri, più di 12 milioni di buttiglie vindute à l'annu, quasi 9 milioni di litri ecc ...

Sta riescita, ùn era cusì sicura. Hè u fruttu d'una cullaburazione, chì si hè tradutta cù un cuntrattu di cuncessione di spluttera di a fonte trà u Dipartimentu di Corsica

Suprana, pruprietariu di u situ è a Sucetà Nova di Spluttera di l'Acque Minerale d'Orezza, ripresentata da a famiglia Mora, originaria di a Monacia d'Orezza.

Un cuntrattu di cuncessione chì hà permessu di dinamizà dinù una micro regione nantu à u pianu economicu è di rimette in ballu a pruduzione è a distribuzione di l'acqua d'Orezza chì oramai si pò truvà in ogni negoziu di a grande distribuzione ma dinù in i caffè di i nostri paesi o puru nantu à i tavulini di e più prestigiose osterie di Francia o di u Stangeru.

Finu à avà ,cuncernendu u funziunmentu di sta cullaburazione , u cuntrattu prevede , ch'ellu splutti a fonte u cuncessiunariu à risichi soi, ch'ellu assicurghi i travagli d'intrattenimentu è l'investiscimenti liati à l'imbuttiglime, ch'ellu percepischi l'integralità di i prudutti, si pigli à collu e cariche di spluttera è dia à u cunedente una somma annuale fissata in funzione di u vulume d'acqua vinduta , somma chì di modu concretu ripresenta à pocu pressu 120 000 euri secondu e vendite annunziate.

Dopu à cuntrastu cuntradittoriu nantu à a durata di a cuncessione in senu à u Cunsigliu Generale d'ottobre di u 2016, è ùn ci l'allungheremu micca nantu à stu puntu, a scadenza di a relazione cuntrattuale hè stata fissata à u 22 d'aostu di u 2018, data aldilà di a quale ci tuccherà à assicurà a cuntinuità di a spluttera di a fonte. In a so deliberazione n°119 di l'11 d'ottobre di u 2016, u Cunsigliu Dipartimentale di Corsica Suprana hà decisu « *d'india, per l'appruntera di u quadru cuntrattuale futuru, una riflessione nova, di più aperta è allergata, nantu à e mudalità di gestione di a fonte dipartimentale è l'oblighi di u gestiunariu à vene in l'interessu generale* »

Aldilà di l'abandonu di a DSP, era stata avanzata l'ippotesi d'un affittu cummerciale nantu à 25 anni è a messa in ballu di una consultazione publica via una prucedura di chjama à offerta. L'estate di u 2018, è a data di u 22 d'aostu avvicinandu si, vulemu sapè, Sgiò Presidente qualesse sò e dispusizione pigliate nantu à stu cartularu, in termine di prucedura è di calendariu, da garantisce l'avvene di l'Acqua Acitosa

Vi ringraziau.